



Innarluutilinnik sullissisutut atorfillit ilinniagaqarnissamut, ingerlaqqiffiusumik ilinniagaqarnissamut pikkorissarnissanullu pisariaqartitsinermik naammassinnittussamik ataavartussamik Naalakkersuisut periusissiorlutillu iliuusissatut pilersaarusiornissaannut piumasaqarfigineqarnissaat pillugu Inatsisartut aalajangiiffigisassaattut siunnersuut. Periusissiami iliuusissatullu pilersaarummi suliniutaasut anguniagassatut allassimasunut naapertuunnersut piffissap ingerlanerani nalilersuisarnissaq ilaassaaq. Periusissiatut iliuusissatullu pilersaarut saqqummiunneqassaaq kingusinnerpaamik EM2021-mi.

(Inatsisartunut ilaasortaq Sofia Geisler, Inuit Ataqtigiit)

(siullermeernera)

Inuit Ataqtigiit ilaasortaataannut Sofia Geislerimut uuminnga siunnersuuteqarneranut qujanaq.

Demokraatinut nuannerpoq takullugu, maani Inatsisartuni isumaqatigiittugut innarluutillit ilaqutaasalu atugaasa pitsanngorsarneqarnissaannut. Suliniutit tigussaasut ilai taakkartulaarpakka.

2017-imi Innarluutillit Illersuisoqalerput malitsigalugulu Pissassarfik pilersinneqarpoq Sisimiuni angerlarsimaffeqartoq. 2019-imi maani Inatsisartuni isummiupparput timikkut innarluutilinnut ikiorsiisarnermut inatsit.

Taakkua saniatigut eqqaasariaqarpoq, maani Inatsisartuni aaliangeratta, innarluutillit pillugit FN-p isumaqatigiissutaa malinneqarnerisooq nassuiaasiortoqassasoq. Nassuiaatip siuariartoqarsimanersooq amigaateqartoqarnerisooq qulaajassavaa, nassuiaallu aallaavigalugu Naalakkersuisut kingusinnerpaamik FM 2022 Inatsisartunut nuna tamakkerlugu iliuusissatut pilersaarut saqqummiutissavaat, innarluutillit FN-p isumaqatigiissutaanik malinninnissamut qulakkeerisussaq.

Taamaattumik innarluutilinnut suliat annertuut ingerlareerput, iluatsillugulu Naalakkersuisut piumaffigissavakka naatsumik killiffissiulaaqqullugu, nassuiaat qulaani pineqartoq sumut killinnerisooq aammalu piffissaq killigitinneqartoq eqqorlugu suliaq naammassineqassanersooq naatsorsuutigineeraat.

Qulaani tunngavilersuutit tunngavigalugit Demokraatit isumaqanngillat, maannakkorpiaq innarluutilinnut suliniutinik allanik aallartitsinissamut pisariaqartitsisoqartoq, taamaattumillu siunnersuutip itigartinneqarnissaa innersuussutigaarput.